



МОНГОЛ УЛСЫН УУЛ УУРХАЙ,
ХҮНД ҮЙЛДВЭРИЙН ЯАМ

15160 Улаанбаатар хот, Чингэлтэй дүүрэг,
Нэгдсэн үндэстний гудамж 5/1, Засгийн газрын II байр,
Утас: 26-35-06, Факс: (976-11) 31-81-69,
<http://www.mmhi.gov.mn>


2020. 12. 07 № 03/2995
танай _____-ны № _____-т

АЖ АХУЙН НЭГЖ
БАЙГУУЛЛАГУУДАД

Коронавируст халдварын тархалттай холбоотой бүх нийтийн бэлэн байдлын зэргийн үед хайгуул, ашиглалтын тусгай зөвшөөрөл эзэмшигч, газрын тосны бүтээгдэхүүн хуваах гэрээт компани болон тэдгээрийн туслан гүйцэтгэгч аж ахуйн нэгж байгууллагууд нь ажилтнуудын ээлж солилцож шилжилт хөдөлгөөн хийх үйл ажиллагаанд баримтлах зааврыг Уул уурхай, хүнд үйлдвэрийн сайдын 2020 оны 12 дугаар сарын 07-ны өдрийн А-312 дугаар тушаалаар батлаад байна.

Зааврыг хэрэгжүүлж, үйл ажиллагаандаа мөрдөж ажиллана уу.

ГАМШГААС ХАМГААЛАХ УУЛ УУРХАЙ,
ХҮНД ҮЙЛДВЭРИЙН УЛСЫН ГАЛБАНЫ
ШУУРХАЙШТАБЫН
ДАРГА Г.НАНДИНЖАРГАЛ



08 2734



МОНГОЛ УЛСЫН
УУЛ УУРХАЙ, ХҮНД ҮЙЛДВЭРИЙН САЙДЫН ТУШААЛ

2020 оны 12 сарын 07 өдөр


Дугаар А-312

Улаанбаатар хот

Заавар батлах тухай

Монгол Улсын Засгийн газрын тухай хуулийн 24 дүгээр зүйлийн 24.2 дахь хэсэг, Гамшгаас хамгаалах тухай хуулийн 33 дугаар зүйлийн 33.1.1, 33.1.14 дэх заалт, Монгол Улсын Засгийн газрын 2020 оны 11 дүгээр сарын 18-ны өдрийн “Бүх нийтийн бэлэн байдлын зэрэгт шилжүүлсэнтэй холбогдуулан эдийн засгийг дэмжих чиглэлээр авах зарим арга хэмжээний тухай” 183 дугаар тогтоолын 9 дэх хэсгийг тус тус үндэслэн ТУШААХ нь:

1. “Ажилтнуудын ээлж солилцож шилжилт хөдөлгөөн хийх үйл ажиллагаанд баримтлах заавар”-ыг хавсралтаар баталсугай.
2. Энэ зааврын хэрэгжилтэд хяналт тавьж ажиллахыг Гамшгаас хамгаалах уул уурхай, хүнд үйлдвэрийн улсын албаны шуурхай штаб /Г.Нандинжаргал/-т даалгасугай.



АЖИЛТНУУДЫН ЭЭЛЖ СОЛИЛЦОЖ ШИЛЖИЛТ ХӨДӨЛГӨӨН ХИЙХ ҮЙЛ АЖИЛЛАГААНД БАРИМТЛАХ ЗААВАР

Нэг. Нийтлэг зүйл

1.1. Коронавируст халдварын тархалттай холбоотой бүх нийтийн бэлэн байдлын зэргийн үед хайгуул, ашиглалтын тусгай зөвшөөрөл эзэмшигч, газрын тосны бүтээгдэхүүн хуваах гэрээт компани болон тэдгээрийн туслан гүйцэтгэгч аж ахуйн нэгж байгууллагууд нь ажилтнуудын ээлж солилцож шилжилт хөдөлгөөн хийх үйл ажиллагааг зохион байгуулахдаа энэхүү зааврыг мөрдлөг болгон ажиллана.

1.2. Энэхүү заавраар зохицуулж буй үйл ажиллагаа нь Улсын онцгой комиссын даргын тушаал, Олон улсын эрүүл мэндийн дүрэм, Монгол Улсын Эрүүл мэндийн яам болон бусад мэргэжлийн байгууллагаас гаргасан тушаал, журам, заавар, зөвлөмжид тулгуурласан байна.

1.3. Энэхүү зааврыг ажилтны ажиллаж байгаа газраасаа оршин суудаг нутаг дэвсгэр рүү явах, мөн оршин суудаг нутаг дэвсгэрээс ажлын газар руугаа очиход үйлчилнэ.

Хоёр. Аж ахуйн нэгж, байгууллагын хүлээх үүрэг

2.1. Хайгуул, ашиглалтын тусгай зөвшөөрөл эзэмшигч, газрын тосны бүтээгдэхүүн хуваах гэрээт компани болон тэдгээрийн туслан гүйцэтгэгч аж ахуйн нэгж байгууллагууд (цаашид “аж ахуйн нэгж, байгууллага” гэх) нь шилжилт хөдөлгөөн хийж байгаа ажилтнуудын оршин сууж байгаа хаягийн бүртгэл, ар гэрийн судалгааг бүрэн гаргаж, шаардлагатай үед холбоо барих бусад хүний утсыг тэмдэглэж, мэдээлэл харилцааны тасралтгүй үйл ажиллагааг бий болгоно.

2.2. Аж ахуйн нэгж, байгууллага нь www.119.mn хаягаар шилжилт хөдөлгөөн хийх ажилтнуудынхаа холбогдох мэдээлэл /аймаг, нийслэлд зорчих шаардлага, иргэний бүртгэл, эрүүл мэндийн байдал болон тэдгээрийн ар гэрт ойрын болон дам хавьталд тусгаарлагдсан, КОВИД-19 халдвараар өвчилсөн хүн байгаа эсэх зэрэг болон бусад мэдээлэл/-ийг үнэн зөв гаргаж, хүсэлтээ аймаг, нийслэлийн Онцгой комисст цахим хэлбэрээр хүргүүлнэ.

2.3. Аж ахуйн нэгж, байгууллага нь ажилчдын ээлж солилцох, шилжилт хөдөлгөөн хийх тохиолдолд ээлж солилцох хуваарь, хамрах хүний тоо зэрэг мэдээллээ нийслэлийн эрүүл мэндийн газарт ээлж солихоос өмнө ажлын 2-3 хоногийн өмнө мэдэгдэх бөгөөд энэхүү мэдээлэл хийх албан тушаалтныг томилон нэр, холбоо барих утас, цахим хаяг зэргийг нийслэлийн эрүүл мэндийн газарт хүргүүлсэн байна.

2.4. Оршин суудаг нутаг дэвсгэрээс уурхай руу очих ажилтныг зорчих хугацаанаас өмнө 72 цагийн дотор КОВИД-19 вирусын PCR оношлуураар шинжилгээ өгүүлж, хариуг www.119.mn хаягаар шалгаж авсан байх ба уг ажлыг нийслэлийн эрүүл мэндийн газартай хамтран зохион байгуулна.

2.5. Тухайн ээлжнээс бууж оршин суудаг нутаг дэвсгэр рүүгээ явах ажилтанд зорчих хугацаанаас өмнө 48 цагийн дотор КОВИД-19 вирусын түргэвчилсэн оношлуураар шинжилгээ хийх ажлыг орон нутгийн Онцгой комисстой хамтран зохион байгуулсан байна.

2.6. Уурхайгаас явах, уурхайд очих аялалд гарахын өмнө эрүүл мэндийн байдалд тандалт хийж, халууныг хэмжин, тэмдэглэл хөтөлсөн байна.

2.7. Ажилтнуудад хамгаалах хэрэгсэл/нэг удаагийн амны хаалтыг 2 цаг тутамд хэрэглэхээр, хаягдал цуглуулах гялгар уут, нойтон алчуур, гар халдваргүйжүүлэх уусмал, нэг удаагийн бээлий, ариун цэврийн цаас/-ийг зорчих хугацаанаас хамааруулан хүрэлцээтэй байхаар бүрэн хангаж, хэрэглэх зааварчилгаа өгнө.

2.8. Шилжилт хөдөлгөөн хийж байгаа ажилтан тус бүрээр дамжин өнгөрөх, шилжин явах замын маршрутын судалгааг гаргасан байна.

2.9. Ажилтны тээврийн хэрэгсэлд суух суудлыг тогтоож, хоорондын аюулгүй зайг баримталж, тээврийн хэрэгслийн дугаар болон суух зорчигчдын бүртгэл хөтөлсөн байна.

2.10. Тээврийн хэрэгслийг маршрутын бус замаар явуулахгүй, зорчигч тээвэрлэлтийн бүх үе шатанд байнгын хяналт тавина.

2.11. Тээврийн хэрэгсэлд зорчих зөвшөөрлийг авсан байна.

2.12. Зорчих чиглэл, маршрут, хөдлөх цагийн хуваарийг урьдчилан баталж, жолоочид заавар, чиглэл, шаардлагатай тохиолдолд холбоо барих хүн, мөн холбогдох аймаг, нийслэлийн Онцгой комиссын шуурхай штабын утасны дугаарыг бэлтгэж өгсөн байна.

2.13. Тээврийн хэрэгслийн бүрэн байдлыг шалгаж, хангуулж, аюулгүй ажиллагааны зааварчилгаа өгч гарын үсэг зуруулсан байх бөгөөд шаардлагатай бол (аялалын үргэлжлэх хугацаанаас хамааруулж) ээлжийн жолоочийг томилсон байна.

2.14. Ажилтнуудад коронавируст халдвараас урьдчилан сэргийлэх, эрүүл ахуй, халдваргүйжүүлэлт, хамгааллын дэглэмийг мөрдөж ажиллах талаар сургалт танилцуулга зохион байгуулсан байна.

2.15. Тээврийн хэрэгслийн кабинд мэргэжлийн байгууллагаас гаргасан Ковид-19 халдвараас урьдчилан сэргийлэх зөвлөмжийг ил байршуулж, мэдээллээр тогтмол хангана.

2.16. Тээвэрлэлтийн явцад хог хаягдлыг ил задгай хаяхгүй, үүссэн ахуйн хог хаягдлыг зориулалтын уутанд хийлгэн, хогийн цэгт төвлөрүүлэн устгах арга хэмжээ авна.

2.17. Ажилтнуудыг зайг баримталж, суудал алгасч суулгахаар суудлын зохицуулалт хийж, тэмдэг тэмдэглэгээг хийсэн байна.

2.18. Ажилтнуудыг зөөвөрлөсөн тээврийн хэрэгслийн кабин болон гадаргууд хийх халдваргүйжүүлэлтийг Эрүүл мэндийн сайдын 2020 оны А/269 дүгээр тушаалын 8 дугаар хавсралтын дагуу гүйцэтгэнэ.

2.19. Халдваргүйжүүлэлтийн бодис нь улсын бүртгэлд бүртгэгдсэн, хэрэглэх ашиглах заавар нь баталгаажсан, хэрэглэх хугацаа дуусаагүй, сав баглаа боодлын бүрэн бүтэн байдал алдагдаагүй, тодорхой хаяг шошготой байна.

2.20. Зөвшөөрөгдсөн ариутгал, халдваргүйжүүлэлтийн бодисыг ашиглуулж, халдваргүйжүүлэх үйл ажиллагаанд шаардлагатай тоног төхөөрөмжөөр хангана.

2.21. Халдваргүйжүүлэлт хийх ажилтныг хувийн хамгаалах хувцас, хэрэгсэл, зайлшгүй шаардлагатай тоног төхөөрөмжөөр бүрэн хангаж, аюулгүй ажиллагааны зааварчилгааг өгсөн байна.

2.22. Халдварын сэжигтэй болон батлагдсан тохиолдол илэрсэн үед голомтын эцсийн халдваргүйжүүлэлт, хог хаягдлын устгалыг нийслэлд Зоонозын өвчин судлалын үндэсний төв, аймагт Зоонозын өвчин судлалын төв хариуцан хийнэ.

2.23. Ээлж солилцох шилжилт хөдөлгөөнд оролцож байгаа ажилтнуудаас энэ зааврын 2.4, 2.5-д заасан шаардлага хангаагүй болон КОВИД-19 вирусын түргэвчилсэн оношлуураар шинжилгээний хариу сэжигтэй гарсан тохиолдолд нийслэл, аймаг, сум хооронд зорчуулахгүй бөгөөд КОВИД-19 вирусын сэжигтэй тохиолдол илэрсэн ажилтныг яаралтай орон нутгийн Онцгой комиссын хяналтад авч тусгаарлах байранд байршуулж, дараагийн шатны оношилгоо үйлчилгээнд хамруулна.

2.24. Аж ахуйн нэгж байгууллагууд нь ажилчдын шинжилгээний зардлыг бүрэн хариуцан ажиллана.

Гурав. Ажилтанд тавигдах шаардлага, хүлээх үүрэг

3.1. Ээлж солилцох шилжилт хөдөлгөөнд оролцох ажилтан нь энэ зааврын 2.4, 2.5-д заасан хугацаанд шаардлагатай шинжилгээг өгнө.

3.2. Ажилтнууд нь иргэний болон ажлын үнэмлэхийг өөрийн биед авч явна.

3.3. Тээврийн хэрэгслээр зорчихдоо аж ахуйн нэгж, байгууллагаас тогтоож өгсөн суудалд сууна. Тээврийн хэрэгсэл дотор болон цонхоор ил задгай нус, цэр, шүлс хаяхгүй, хог хаягдлыг байгууллагаас бэлтгэж өгсөн хогны уутанд битүүмжилж, эцсийн зогсоол дээр ирмэгц жолоочид үлдээнэ.

3.4. Ажилтнууд халдвар хамгааллын дэглэмийг баримталж /хооллохоос бусад нөхцөлд амны хаалтыг авахгүй байх, бээлий өмсөх, нэг удаагийн амны хаалтыг 2 цаг тутам солих, бээлийг тайлсан тохиолдолд гарыг халдваргүйжүүлэх, бусадтай биеэр хүрэлцэхгүй байх, архи согтууруулах ундаа хэрэглэхгүй байх, ойролцоох суудлын зорчигч болон олноор нэг дор бөөгнөрч ярилцахгүй байх/ мэргэжлийн байгууллага болон жолоочийн шаардлагыг биелүүлнэ.

3.5. Ажилтан гэртээ амарч байх хугацаандаа оршин суугаа тухайн бүс нутагт тогтоосон дэглэмийг баримтална.

3.6. Амрах хугацаандаа халуурсан, ханиасан, амьсгал давчидсан зэрэг коронавируст халдварын шинж тэмдэг илэрсэн, өвчтэй хүнтэй хавьтал болсон тохиолдолд оршин суудаг нутаг дэвсгэрийн эрүүл мэндийн байгууллагад

мэдэгдэж, өгсөн зөвлөмжийг дагаж мөрдөх ба энэ тухай байгууллагын удирдлагадаа даруй мэдэгдэнэ.

Дөрөв. Ажилтнуудыг тээвэрлэх тээврийн хэрэгсэл болон жолоочид тавигдах шаардлага, хүлээх үүрэг

4.1. Жолооч нь аж ахуйн нэгж, байгууллагатай хөдөлмөрийн болон хөлсөөр ажиллах, ажил гүйцэтгэх гэрээ байгуулсан ажилтан байх бөгөөд эрүүл мэндийн үзлэг болон нийгмийн даатгалд бүрэн хамрагдсан байна.

4.2. Тээврийн хэрэгслийн бүрэн бүтэн байдлыг хангаж, аюулгүй ажиллагааны зааварчилгаа авч, гарын үсэг зурсан байна.

4.3. Жолооч нь өөрийн болон зорчиж байгаа ажилтнуудын аюулгүй байдлыг хангаж, халдвар хамгааллын дэглэмийг мөрдөж, замын туршид агаар сэлгэлтийг анхаарч, агааржуулалтын төхөөрөмжийг тогтмол ажиллуулна.

4.4. Жолооч нь ажил олгогчоос зөвшөөрөөгүй, тухайн чиглэлд зорчих эрхгүй иргэнийг тээвэрлэх, зөвшөөрөгдөөгүй чиглэлд зорчих, зогсохыг зөвшөөрснөөс бусад газарт зогсож, ажилтнуудыг буулгахыг хориглоно.

4.5. Мэргэжлийн хяналтын улсын байцаагч болон бусад байгууллагын эрх бүхий албан тушаалтны тавьсан зүй ёсны шаардлагыг биелүүлж, халдваргүйжүүлэлт хийх ажилтны зөвлөмж, зааврыг мөрдөнө.

4.6. Тээвэрлэлтийн явцад сэжигтэй тохиолдол, шинж тэмдэг илэрсэн ажилтан тогтоогдвол тухайн аймаг, нийслэлийн онцгой комиссын шуурхай штабт мэдэгдэж, суурин газарт нэвтрэхгүй, тандалт судалгааны багийг иртэл зорчигчдыг тээврийн хэрэгслээс гаргахгүйгээр байлгана.

4.7. Ажилтан тээвэрлэх явцад зорчигчийн хэрэглэсэн амны хаалт, бээлий, ахуйн хог хаягдлыг цуглуулж, нийслэл, орон нутаг, уурхайн зөвшөөрөгдсөн хог хаягдлын цэгт битүүмжлэн хаяна. Ил задгай болон бусад цэгт хаяхыг хатуу хориглоно.

Тав. Бусад

5.1. Энэ зааврыг зөрчин халдвар, хамгааллын аюулгүй байдлыг алдагдуулсан ажилтан, албан хаагчийн үйлдэл нь Эрүүгийн хууль болон Зөрчлийн хуульд заасан хариуцлага хүлээлгэхээргүй бол аж ахуйн нэгж байгууллага нь хөдөлмөрийн гэрээ, болон хөдөлмөрийн дотоод журмын дагуу шаардлагатай хариуцлагын арга хэмжээг авч, хариуцлага тооцон ажиллах.

5.2. Энэ зааврыг зөрчсөн үйлдэл нь Эрүүгийн хууль болон Зөрчлийн хуульд заасан хариуцлага хүлээлгэхээр бол зөрчил гаргасан аж ахуйн нэгж байгууллага болон иргэнд холбогдох хууль, тогтоомжид заасны дагуу хариуцлага хүлээлгэх саналыг эрх бүхий байгууллагад хүргүүлж шийдвэрлүүлнэ.